



10.10.2025
754/25

საქართველოს კომუნიკაციების
ეროვნული კომისიის თავმჯდომარეს
ბატონ კახი ბექაურს

ბატონო კახი,

მპს „სელფი მობაილ“-ი (შემდგომში მოხსენიებული, როგორც „სელფი“) გაეცნო საქართველოს კომუნიკაციების კომისიის მიერ 2025 წლის 4 სექტემბრის N გ-25-23/445 გადაწყვეტილებას, რომლითაც კომისიამ დაიწყო საჯარო ადმინისტრაციული წარმოება მიწისზედა სისტემებით ელექტრონული საკომუნიკაციო მომსახურების განსახორციელებლად რადიოსიხშირული სპექტრით სარგებლობის ლიცენზიების მისაღებად მრავალლიცენზიანი (თანმიმდევრული) აუქციონების გამოცხადების მიზნით. აღნიშნული ადმინისტრაციული წარმოების ფარგლებში, 2025 წლის 5 სექტემბერს კომისიის მიერ გამოქვეყნებულ იქნა მიწისზედა სისტემებით ელექტრონული საკომუნიკაციო მომსახურების განსახორციელებლად რადიოსიხშირული სპექტრით სარგებლობის ლიცენზიების მისაღებად მრავალლიცენზიანი (თანმიმდევრული) აუქციონების გამოცხადების შესახებ გადაწყვეტილების პროექტი (შემდგომში „პროექტი“), რის შესახებაც წარმოგიდგენთ ჩვენს მოსაზრებას:

1 საკითხი:

გამოცხადებული აუქციონების 4 ლოტს თან ახლავს შენიშვნა სიჩქარეებთან დაკავშირებით, კერძოდ:

1, 2, 3 და მე-4 ლოტებზე

შენიშვნა 3: იმ შემთხვევაში თუ №1 აუქციონში გამარჯვებული პირი აუქციონების დასრულებისას ამასთანავე იქნება №2,3,4 აუქციონებიდან ნებისმიერ ერთ-ერთ აუქციონში გამარჯვებული პირი (ანუ ვახდება 2100 მჰც სიხშირულ დიაპაზონში 40 მჰც ფლობელი) და ლიცენზიები შეძენილი იქნება მაღალი მინიმალური სიჩქარის ვალდებულებით (ანუ 20%-იანი ფასდაკლების გათვალისწინებით) მაშინ მინიმალური სიჩქარე განისაზღვრება 28.65 მბ/წმ-ით; იმ შემთხვევაში თუ №1 აუქციონში გამარჯვებული პირი აუქციონების დასრულებისას ამასთანავე იქნება №2,3,4 აუქციონებიდან ნებისმიერ ერთ-ერთ აუქციონში გამარჯვებული პირი (ანუ ვახდება 2100 მჰც სიხშირულ დიაპაზონში 40 მჰც ფლობელი) და ერთი ლიცენზია შეძენილი იქნება მაღალი მინიმალური სიჩქარის ვალდებულებით (ანუ 20%-იანი ფასდაკლების გათვალისწინებით) ხოლო მეორე ლიცენზია მაღალი მინიმალური სიჩქარის და 20%-იანი ფასდაკლების გარეშე მაშინ მინიმალური სიჩქარე განისაზღვრება 27.3 მბ/წმ-ით; იმ შემთხვევაში თუ №1 აუქციონში გამარჯვებული პირი აუქციონების დასრულებისას ამასთანავე იქნება №2,3,4 აუქციონებიდან ნებისმიერ ერთ-ერთ აუქციონში გამარჯვებული პირი (ანუ ვახდება 2100 მჰც სიხშირულ დიაპაზონში 40 მჰც ფლობელი) და ლიცენზიები შეძენილი იქნება მაღალი მინიმალური სიჩქარის ვალდებულების და 20%-იანი ფასდაკლების გარეშე მაშინ მინიმალური სიჩქარე განისაზღვრება 26 მბ/წმ-ით;

მიგვაჩნია, რომ აღნიშნული შენიშვნის ვალდებულება უნდა დაკორექტირდეს, რადგან შემდგომ შეძენილი 2 ლიცენზიიდან ერთი თავისი შეხედულებისამებრ შეიძლება გამოიყენოს სხვადასხვა ტექნოლოგიაში, ხოლო მეორე სხვა ტექნოლოგიაში მაგ. 1-ელ აუქციონში შეძენილი სიხშირე გამოიყენოს 3G ტექნოლოგიისთვის, ხოლო მე-2 აუქციონში შეძენილი სიხშირე LTE ტექნოლოგიისთვის.

კერძოდ, სელფის მიერ 2100 მჰც 2 ლიცენზიის შეძენის შემთხვევაში სელფს ექნება 40 მჰც. თუმცა, 20 მჰც 2026 წლის მეორე კვარტლის ბოლომდე გამოყენებული იქნება 3G ტექნოლოგიაზე. შესაბამისად, უფრო სამართლიანად მიგვაჩნია მინიმალური სიჩქარის ვალდებულება განსაზღვრული იქნას 2 ლოტის შესაბამისად.

აგრეთვე, დასაკორექტირებელია სიჩქარეები ტექნოლოგიების მიხედვით და, აგრეთვე, სიჩქარეების აღნიშნული მოთხოვნა უნდა ვრცელდებოდეს იმ შემთხვევაში თუ ორი აუქციონის მოგების შემთხვევაში მოგებულს გადაეცემა მიყოლებული ზოლები და აღნიშნულ მიყოლებულ ზოლებს იყენებს ერთ ტექნოლოგიაში.

მიგვაჩნია, რომ დაზუსტებას საჭიროებს, მინიმალურ სიჩქარეს ოპერატორი უნდა აკმაყოფილებდეს მხოლოდ აღნიშნულ აუქციონზე შეძენილი სპექტრით თუ აღნიშნული მოთხოვნა დაკმაყოფილებულად ჩაითვლება ოპერატორის მიერ მის სარგებლობაში არსებული სხვა სიხშირეების გამოყენებით/დანმარებით მოთხოვნილი მინიმალური სიჩქარის დაკმაყოფილების შემთხვევაშიც.

2 საკითხი:

გამოცხადებული ექვსივე აუქციონის დაფარვის ვალდებულების ვადები, კერძოდ, დასახლებული პუნქტების (სადაც მოსახლეობის რაოდენობა აღემატება 20 000-ს) **90% ტერიტორიის დაფარვა 2026 წლის პირველ მარტამდე**, მიგვაჩნია, რომ არარეალისტური და ფაქტობრივად შეუსრულებელი ვალდებულებაა ვინაიდან, აუქციონის ჩატარების თარიღად განსაზღვრულია 2025 წლის 4 დეკემბერი. ხოლო, 4 კალენდარულ თვეში აღნიშნული დაფარვის უზრუნველყოფა შეუძლებელია ოპერატორისთვის. ვინაიდან, ოპერატორმა ჯერ უნდა განახორციელოს შესაბამისი აპარატურის შეძენა და საქართველოში ჩამოტანა, რომლის მინიმალური ვადა, ყველაზე კარგ შემთხვევაში, შეიძლება იყოს 90 კალენდარული დღე. ხოლო, შემდგომ შესაბამის დასახლებულ პუნქტებში საჭირო სამონტაჟო სამუშაოების განხორციელება, რაც აგრეთვე დიდ დროს და რესურსს საჭიროებს. შპს „სელფი მობაილ“-ის შემთხვევაში სამუშაოები ჩასატარებელი იქნება 580 საბაზო სადგურზე. შესაბამისად, მიგვაჩნია, რომ დაფარვის ვალდებულების შესრულების ვადა, რომ გახდეს რეალისტური, უნდა შეიცვალოს და განისაზღვროს 2027 წლის 1 მარტამდე.

შპს „სელფი მობაილ“
იურიდიული დირექტორი
ირაკლი ესართია